

清容居士集

附札記

三





清容居士集

附札記

(三)

袁桷撰

清谷居士集卷第五

古詩

五言

爲贛川連教授賦梅城

稜稜太古根。縈帶鐵不如。飛塵望其藩。卻走奔無餘。中有冰玉人。指揮萬瓊琚。低昂受其職。補理成扶胥。天空斗搖寒。令嚴察孤虛。練袍立清夜。鮮明映犀渠。積雪誰爲驕。慷慨紛模糊。陰陽本一氣。開門使之俱。險絕貴有道。面壁非吾徒。司晨起視旦。蜨夢方遽遽。

泊貫州次韻仲章

沙塵暗河津。遊雲蕩無餘。忽忽萬里念。眇眇孤鴻俱。風水淹行頓。異縣非故居。雞鳴逐前邁。殘星澹遺珠。空林野氣肅。古樹慘不舒。飢禽何其悲。驚飛挾鳴雛。迺知俛啄意。愧我將焉如。道遠怯驚隘。終憶山中廬。誓言息機事。解纓慎馳驅。初夏鬱新潯。永日誰爲娛。因之寫初志。臨風復躊躇。

次韻呂學正古意二首

初筵秩嘉賓。容氣清且明。至饗不在酒。尊疊粲東榮。傷哉崇飲徒。偏宕四坐驚。中有獨醒士。覲然愧非輕。持觴懼濡口。孤吹幽凰鳴。永飢詎遺禮。俎實期充庭。苦心嗜昌陽。古澗香莫識。之人遠持贈。藉以五色石。密節懷勳章。寒暑端莫易。三咽迴中腸。起止良得力。

舉世希妍英。椒蘭政紛職。慎勿強嗜之。斲泉澡其德。

次韻元復初春思三首

凍樹迴青陽。羈禽競新哢。喧喧人語浮。稍稍春事動。澄心絕芳華。小睡足幽夢。夢覺天宇新。朝光集飛棟。遊塵逐平皋。秀色翳榛莽。油雲互東西。鬱抑不能雨。昭蘇在玄功。竟夕復延佇。何當挾其巔。振翮窮委羽。遠客芳草思。湛湛天外舟。坐令親知疎。低徊此淹留。古樹擢奇石。清流匯芳洲。素心諒有在。胡不爲茲遊。

雨後聞鶯

衆卉沐新雨。幽光澹餘情。岸幘碧窗冷。卷簾白雲生。起坐調素絃。促軫流鶯鳴。似言田家苦。招我田中行。昨宵殷其雷。願言興滿盈。

送李德隆經歷。其父居澧陽。因乞郡江陵。以便省養。

悠悠澧陽川。飛鴻去無極。白雲眇何方。抑鬱萬里色。念之不得從。肉臂誰爲翼。翩然領南郡。解此終歲憶。楚宮昔壯麗。冠珮列瑤席。瓊英輯佳思。落筆洒金碧。淒其千載下。正氣堅鐵石。想此問俗餘。醇酒追寂歷。平生功名意。甘旨惕朝夕。懷章遂其初。居夷亦云適。藝蘭襲孤芳。種橘企嘉植。永言區中塵。過隙殊未息。

節婦吟

爲蒙氏作

幽蘭淨如洗。晦靄桑麻墟。天低泣清露。因依護紛敷。春風遠相負。迺在萬里餘。明月流素光。願鑒夫君裾。荷戈力行役。誓將保無渝。難以一日歡。永失千歲娛。

蕩蕩明河側。雙星隨斗移。會合靡有覩。恍惚生怪奇。古意不復識。今情益多疑。契闊三十春。百年以爲期。白首一邂逅。孤芳秉華滋。感此初意深。臨風託長辭。

次韻范德機海鵠篇

黃鵠海上來。逍遙遊帝所。寥寥九萬里。五采紛異覩。朝霏西山霞。暮結平地土。喧啾舞晴翠。鵠首不復頽。孤鳴者何禽。振翮亦遐舉。惜兮邂逅之。落月耿清侶。芝糧產層巔。蘭珮在遠浦。八表同其光。欲言淚如雨。臨分致黃鵠。出處各有許。方壺渺麟洲。輪囷爲君佇。

送任懷可

跼跼水上鳶。游游釜中魚。鳶飛不得息。魚呬何時蘇。興言夙行邁。晴秋振修途。挈衣海上州。出日搖珊瑚。采瓊以爲糧。拾羽以爲裾。妙顏感芳蕤。流光耀陽烏。盛意勿復沮。清氛靜無餘。維南有英雲。矯首出門初。團團御飛蓋。隨君爲躊躇。勗哉植明德。含章俟昭圖。

同復初功遠飲仲章家觀芍藥分韻得一字

深沈碧雲居。錯落紫瓊室。芳菲護餘春。清和表昭質。高叢吐駢剛。新茁角繭栗。傾心愛膏露。正色浴初日。含香紫宸朝。奏舞彤庭侑。駢頭澹無妬。背面意愈密。杯翻王母下。斗碎壯士失。霏霏玉生煙。漾漾珠吐液。絕容第無雙。薄醉飲真一。嫣然屬幽賞。爲爾寫清逸。

洛詠五首示洛人張孟功任大正

晴雲起嵩嶽。變化如游龍。感彼金谷人。聚散同飛蓬。縈紆古瀍澗。百井爭汲舂。昔有陳思王。作賦雕層空。相望不得語。遺情寄冥鴻。金隄手所植。荒淫竟無蹤。三川鼎沈淪。洛水以土勝。如何羣英聚。千載兵甲競。仙人王子喬。吹笙白雲頂。下視北邙塚。今爲狐兔穿。斷碑化灰劫。來者日以盛。箕山水泠泠。側聽發深省。森森古名園。玩芳納玄覽。澹然觀物翁。欣至情不減。看花烏帽落。秀色起晴臉。一一卿相居。舉觴雲氣湛。尸坐寒暑遺。妙言天地範。一去三百年。寒松白雲黯。昔有好奇士。絕頂觀海浪。神泣肝膽翻。興逸天地放。泥金與玉檢。縱筆紀其妄。茲山久寂寞。着屐事幽訪。太少何岩巖。兩曜隨下上。彩鸞凌風翔。疑有帝子降。經郭闡微言。理窟洞玄化。汲汲高山叟。反復窮代謝。白璧匪有瑕。後賢極譏射。麟經書薨卒。外臣不以假。如何莽大夫。簡牘得矜詫。往聖旣莫從。掩袂效喑啞。

贈汪生

投簪事卻掃。衡門無雜賓。衝檐鳥雀噪。魁梧見斯人。遺我以琲珠。神光絢嶙峋。風雅久不作。雄辭逞斷斷。愛君春雲姿。回旋轉空輪。飛英不受采。積潤凝青蘋。老我意苦短。念此情彌親。疇昔侍金鑾。挽士志莫申。薦禰固百一。視君鮮儔倫。先聖六籍功。願言善彌綸。辱贈莫能報。清風響蒼筠。

感興

明月不受采。澄波偶成文。壤壤玄黃中。至理孰與分。南山有琪樹。蒙彼山上雲。層陰闕朱光。積潤養奇芬。深林葆真素。芳妍澹無聞。昨來京國遊。緇塵日芸芸。永念丘壑趣。攬衣意如焚。

題王眉叟溪月圖

水清不受觸。月高不受浴。空景兩相忘。松風進虛谷。之人閱真靜。引手還在目。服之飛上天。溪流淨如玉。

書孝子卷

道旁拾枯松。汲水作糜粥。堂前九十母。啜粥端勝肉。人言五鼎養。形渥迺有辱。擊鮮豈無具。彼網不敢觸。乃翁三尺墳。慈烏爲之築。亭亭忘憂花。甘露手可掬。花開醉春風。百歲初轉轂。之士歎有餘。之人何不足。

夜泊城北有懷孫秦二學士

英英二學士。黼黻元祐初。功名軋姦黨。翰墨尊寰區。維昔淮南邦。風流藹清都。至今舊文采。老蚌遺神珠。百年俎豆廢。荒城屹秋蕪。黑首總論武。舊老時言儒。白雲去已久。來往今何如。蒼蒼灌木陰。曾聞駐瓊裾。艱難視天運。俛首猶唐虞。稻米竭秋斂。菱芡餘歲儲。白鷗眇天末。蘆葦寒蕭疎。懷賢願有在。佇立情躊躇。

淮口阻雨二首

曉雨壓風力。我帆同款段。帖帖篷底眠。晝日慘易短。獨行旣無儔。欲去不得返。冥濛水雲重。寂歷榆柳斷。淮流旣東馳。我行安可緩。縈迂沂三叉。始覺人語亂。艱難意如斯。寒鴉佇江岸。小雨不作潮。餘清在春樹。冥鴻歸興深。振翼美無度。淒涼舊如此。荏苒已增嫵。茫茫昔荆榛。桑柘青幾許。

淮水去不休。歲閱今與古。風雲合浩蕩。我輩勞步武。人言上水地。沙流半焦土。行役儻自然。春雲起飛靈。

詠史四首

青青虞美人。欲舞不解前。漫漫劉寄奴。醫國真茫然。風迴下相里。寒沙起蒼煙。徘徊古彭城。亦復多流泉。二者骨已朽。胡爲事春妍。人生要垂芳。豈託小草傳。丈夫與女子。籍籍同悲憐。

寰宇設天險。圖書已周知。鴻溝定疆理。屈意陳卑辭。永觀沛公豪。豈無懷土思。羣雄亦鄉黨。輕家迺相隨。時來各忍性。不復兒女悲。它年過沛宮。父老垂涕洟。井邑圖新豐。雞犬猶前時。論功食湯沐。故里俱無遺。成敗論昔人。興懷重嗟咨。

留侯晚辟穀。端有避禍意。遠招商山翁。不復爲漢計。平生老鋒鏑。帷幄乃真智。南宮論非諛。意冷終有忌。雍容視國本。孱子匪神器。此坐端可惜。欲言且深慮。代王豈不佳。語出禍立至。羽翼從汝成。矰繳幸我避。百年願已足。投老空立異。不見吹簫民。功成終械繫。

人言漢淮陰。晚歲何卑陋。英賢多混跡。豈復論恩讐。泊舟楚山川。緬懷意悠悠。責人斯無難。此意猶前修。近世輕薄兒。流落曾相投。飢來或乞食。寒至將索裘。一朝青雲上。泯默懷深羞。高視絕舊好。削跡同避仇。當年睚眦意。談笑能相酬。韓生固瑣瑣。終勝青雲流。斯人我非慕。微言儆羣媮。

次韻仲章初夏卽事

吏隱習疏曠。晨起遣世情。積柳含綠潤。幽葵表朱明。誰云地氣高。炎暑從茲生。新潦變歎源。飛塵增墳盈。

養痾尋丈內。跬步不復行。雲浮晚色盡。平湖起秋聲。炎涼在頃刻。變化何縱橫。繕性合天和。愧彼塵網嬰。有懷金石交。飛蓋何由傾。

城南亭

平生泉石意。勝處時相關。似聞城南亭。層陰絕塵閭。初夏結清譙。尊罍連珮環。涼襟納虛白。妙顏尊渥丹。高歌互激越。白日虛且閒。志適不願足。後會期躋攀。晴霞澹天末。迴首疑仙寰。

讀范德機東坊臺

范子東坊居。深巷蔽樛木。架上一帙書。牆東數叢菊。明月照西山。清夜勤盟沐。學爲孤鳳吟。非絲亦非竹。陰陽合萬籟。逸響振林谷。水花不受唾。天衣那有觸。玉署青裳枝。三嗅羞獨宿。滄洲有真趣。從此謝榮辱。

武當張道士京師騰雨迴山中

古有巖居子。抱朴尸玄冥。被髮空洞遊。蒼莽窮帝青。手持九九文。蜿蜒合揚靈。維斗司其紐。習坎鞭流霆。良疇已懷新。燥露滋明星。滌滌原野燄。迴風轉塵腥。無譁夜下令。瞬息不得停。茲人祕元化。長跪耳默聆。崑崙挾潢漢。紫霧噓青萍。玄鶴淪以淒。百谷奔零零。浮侈不足慕。趣使歸巖扃。天地古橐籥。鍊一清且庭。詭幻歲已暮。願言養修齡。

觀梅分韻得影字

月窟迴初陽。瑰室習真靜。深居碧雲合。澄觀白日永。南枝歷煙霧。北雪辭嶠嶺。蟠柯翠交加。疎萼玉秀整。

三襲雜纖縉。一漱芙蓉井。浴鵲採其光。寒蜂妬其影。將養憂過分。泯默發深省。天空流蟾墮。露冷玄鶴警。歌罷誰與言。觴至不復逞。

送陳仲剛歸番陽

浩蕩南客心。崢嶸西山雲。憶昔登王畿。縑紉集同文。執簡玉署側。藻思抽奇芬。明世合儒彥。詎有楚越分。羣姝嫉蛾眉。念至肝膽焚。番江匯新田。甘雨催初耘。不念別者苦。孤翮誰爲羣。重柳積翠霧。酒盡不得醺。扁舟鼓新棹。晴川淨芸芸。

送薛玄卿歸吳予時有上京之行

飄飄江海遊。渺渺關河役。燕鴻有相避。客子無定跡。南山火雲高。北山雪新白。想此六月時。相顧各動色。堠傍青松樹。上有雙鵠翼。愛君慎舟楫。戒我專寢食。擾擾行路難。風花亂如棘。

有感

皎皎白面生。長鋏學短長。箕坐激楚聲。大言響高堂。有客將止之。反脣臂欲攘。客退不敢言。彼怒庸何傷。盈盈百花露。擬作終歲糧。露晞百花隕。掩袂翻徬徨。

董道士雷泉齋

淵淵養空洞。摩盪升天行。翻車震崑崙。旋空紫金明。下有五采雲。散絲隕珠英。以彼一寸光。八表須臾成。逆順有正性。變合無流形。火以明益枯。水以堅始凝。無爲合沖澹。神化凌上清。

三月十二日。自殿廬歸舍。梨花盛開。薄暮與陳汝海花下小飲。

兩人一百歲。共飲三十杯。雙花夾蒼檜。天桃倚晴臺。白團燕山雪。紅注天台醅。振鷺擬高下。遊蜂謝徘徊。昂首冠接鼎。捧心舞毵毹。殘日凝餘霞。迴風起輕雷。不念影寂寂。但惜光皦皦。珠衣點綴滅。粟尺彌縫裁。團圓粧奩巧。宛轉寒紋迴。香深妬紫檀。色靚羞蒼苔。幸茲豔陽盛。不以塵土摧。凡卉工後先。孤根靜栽培。翫芳悟觀象。擷英審掄材。較轍青紫場。躡藉錦繡堆。高羞折腰柳。逸亞橫枝梅。慙慙識花意。浩蕩爲我開。殿廬龍光動。瑣窗駒影催。相迎復相恨。欲去還相陪。停雲儼若思。落月寒如灰。當歌願秉燭。渴吻驚恥罍。

送祝丹陽使武當山

夙昔山水郡。浮身宅冰霜。迴首楚望深。乘車升武當。上有天一池。夾日紅熒煌。玄雲起丹甲。羣螭恣騰驤。攀崖靈壽杖。坐石芙蓉牀。琳琅徹迴鸞。儼立承天香。麻衣採芝叟。百歲鬚眉蒼。授子以易知。永視元運長。摩挲古金人。輾轉日月光。中臺古嵒峯。天風振層岡。揮手謝來者。下土何遑遑。

贈陳文翁求篆扁

往聖挾天巧。蟲魚構瑰奇。辛勤汗簡功。淪落誰傳茲。昂昂子陳子。掇拾靡棄遺。清齋淨無塵。素壁懸秦碑。似欲臥其下。畫腹鬼神悲。氣酣落長牋。屈曲生妍姿。斷嶂立冰箸。迴波捲葦絲。百幻頃刻成。長鋒勁如錐。解衣坐晴窗。青眸光陸離。客喧意自寂。手敏心相違。遠憐李氏子。自謂一代師。蒼徨大夫門。筆冷情依依。得非金注昏。竟墮豪俠欺。我家竹石居。甕牖迎春曦。煩君作佳扁。朝夕舒頑疲。夜月走魍魅。晴雲鬱蛟螭。

高張駭衆客。傳觀恐羣兒。能事敢強迫。妙處通天機。會須風日清。醉墨傾淋漓。

送李平叔之信陽

維昔文昌公。幽蘭閼孤芳。高秋振餘清。百卉爭斂藏。颯爽眉髮古。峨冠坐鄞庠。歌詩闡溫柔。宮商起虛堂。絢爛五色雲。縹緲鳴鸞凰。至今老諸生。猶能記鏗鏘。乘風侍金華。蹇諤懷剛腸。諫疏納帝榻。百王斂妖芒。年運旣莫從。精爽回雲鄉。空餘子雲宅。澗水猶湯湯。永思古遺直。江湖眇相望。竭來芙蓉峯。喬木鬱以蒼。巍然孫枝秀。妙譽參珪璋。投牒山水州。清溪趁輕舫。羣公列贈語。握手揮離觴。我生識面晚。懷賢意何長。慨茲衣冠冑。兼葭隕飛霜。交衢泣零落。寸心實徬徨。斯文儻未墜。龍虎回天章。願言紹正學。青雲縱翱翔。

贈徐中丞二首

南海有玄鶴。孤唳雲棲層。天池不肯下。厭此魚鼈腥。露冷懷長飢。慘澹舒寒翎。空巖蔽喬松。鬱鬱太古青。喬松意何悄。陰籟驅羣靈。下有散髮翁。默誦離騷經。妙顏粲瓊芝。孰視眸晶瑩。鏗然拔長劍。神光發新硎。倏忽去已遠。玄鶴空唳晚。爲言來何遲。迴風起前巘。鳧氏哀吉金。紅鑪範黃鍾。鍾成飾雕簾。岌岌蟠虬龍。大鳴淳以希。小鳴和且沖。高懸饗羣帝。祥雲布青紅。羣帝難強留。一去三千秋。張筵設尊罍。庸錫南諸侯。一擊黃鵠來。再擊飛雲收。徬徨不敢聽。亟以還中州。師曠世本有。左高悵誰謀。終然侍帝所。天地歌同流。

拙訥齋

樗櫟老薪樵。雁以不鳴烹。受形既非材。卒莫全其生。在昔有至人。觀化通百靈。至言貫圖象。妙思窺璣衡。乃爲萬物宗。熙熙遂生成。髡彼青牛君。深根護靈局。永哂鄉原子。木偶欺聾盲。設喻深止之。跬步增慎兢。世路日榛棘。韜精事沈冥。滄江渺何許。願言濯吾纓。

送鄆陽劉縣令之官宣寧二首

崑崙馬邑州。火山蒸鬱陶。霜勁角弓直。草淨蒼鷹條。平沙細成塵。迴風湧銀濤。想彼強盛時。馳突聲嗷嘈。烽煙徹雲衣。低昂望前旄。樓煩古喉襟。燕秦據其尻。八月秋氣肅。千家釀蒲萄。

帝京布文教。列邑施官曹。井屋魚鱗齊。禾黍黃雲高。幡然土俗變。帖首羞雄豪。出宰試敏手。良庖靡吏刀。善政舊謠傳。據案除民饕。村村煙火通。長塗罷建囊。雞鳴流水遠。雁過平陂鰲。餘情樂觴詠。臨風謝喧囂。

題文與可風雨墨竹

妙筆挾天巧。黑雲參差高。偃疑受雨深。倏欲淩風颿。颿爽隨卷舒。清涼散塵囂。湛湛不受暑。靈籟虛窗號。緬懷文湖州。玉雪中豪想。此旁礪時葆。光解天弢。老僧道機熟。形影隨目逃。持以深贈之。生意窮秋毫。高齋夜氣寂。定回起層濤。

答李生裕

尙書大同
公會孫

英英金華伯。皓首人中龍。橫經古鄆水。歌詩倣羣蒙。舊爲鄉里教授。歌風雅以訓諸生。正色侍邇英。微言動宸聰。一疏不合意。孤身轉秋鴻。俯仰乾坤旋。舊聞眇遺蹤。坐令詩書宅。寒雲翳孤桐。維曾秉文度。月印五采虹。知我夙

昔似贈言啓春容。清朝集文儒。直筆書清忠。作史聖有訓。狐裘覲蒙茸。挽士貴無方。正色誰爲宗。虛舟萬斛積。遇順淩剛風。明時詎淹留。勗德會有逢。

題巨然楓林雅集圖

楓林集虛秋。灝氣轉寥廓。坡危草纖纖。水露石鑿鑿。四子何方來。黃塵滿芒屨。據流濯其清。班荆坐盤礴。山童注新泉。支鼎拾薪籜。方囊濟勝具。一一隨取索。想彼談笑時。天弢脫塵縛。上追巢許高。下陋山王薄。淒涼金谷宴。腥羶甕雞樂。又疑東山遊。粉鈿汙花萼。老僧習止觀。雅趣隨筆落。振衣從之遊。素壁儼酬酢。

避塵軒

飄風捲飛蓬。咫尺隔煙霧。馳車與急騎。憧憧走當路。各云有所之。瞬息不得語。山陽荷篠翁。守舍視日暮。酌彼澗下泉。膏沐美無度。寒光映玉頰。浩論巖中趣。永謝征塗人。看雲養真素。

次韻伯生榆林中秋

榆林月中來。今月向此出。天低鳥翼滅。野淨田事畢。驛馬西北鳴。候吏語喧唧。我行起視夜。炯若積雪白。昂頭望玄宮。耿耿駐營室。坐令八方澄。不使萬景沒。徘徊清影孤。踟躕悵後發。

送鄭景尹還里

蟬冕生詩書。世胄迺鄙夷。沈沈喬木宅。風煙暗茅茨。此理固莫詰。或言有盛衰。堂堂魏王勳。談笑帝者師。風雲締嘉會。青史傳忠規。諸孫靜且秀。振鷺遊天池。鄉社三十年。永謝紈綺姿。興至來上國。窺探挾幽奇。

聞聞與見見。柳下揚鞭辭。前聖六籍功。尊聞審羣疑。江源發甕口。濫觴渺無涯。願持一寸膠。黃流化晴漪。天風捲秋濤。舟楫慎所持。時至諒有得。衡門詎棲遲。

李野齋別墅圖

別墅依平陂。翳翳桑麻陰。田翁理農具。晴雲起遙岑。于時春事初。佳樹響鳴禽。先生朝出遊。呼童佩瑤琴。仲也行比肩。叔也聲相尋。興至或坐石。臨流散虛襟。有客攜酒壺。勸我手自斟。共言羲皇時。古風藹淳深。巍巍居仁里。盛德世所欽。三鳳在高岡。參飛起清音。恂恂化卑讓。歲往猶傳今。披圖儼見之。慰我夙昔心。

子昂人馬圖

飄騰天山霧。盪摩玉京雲。耿耿萬里姿。矯首空其羣。迺翁愛神俊。泚筆五采分。翁歸侍帝所。乘化觀芸芸。彼亦與之俱。追風超九垓。時松雪翁已下世一年。

題墨蘭圖

秉芳空林中。介石交不黷。飛英散玄佩。受露以膏沐。羣妖春炫晝。墨守益慎獨。豈不念歲晏。自獻傷我足。矯矯金石交。挽之不盈掬。疏清湛虛心。振直耿絜腹。昊天有正令。俛仰萬物肅。臨風獨躊躇。白駒儼空谷。

次韻瑾子過梁山灤三十韻

大野豬東原。狂瀾陋左里。交流千尋峯。會合百谷水。量深恣包藏。神靜莫比擬。碧瀾渺無津。綠樹失其涘。揚帆鳥東西。擊楫鷗沒起。長橋篙師歌。短渡販客止。天平雲覆幕。灣迴路成砥。鷹坊嚴聚屯。漁舍嘆渚汜。

柳絲翠如織。荇帶組交蕤。出日浮鉦金。明霞紆綬紫。一畝澆腸迴。三頰慰顙泚。高桅列魚貫。遠吹生鳳觜。前奔何無休。後進復不已。遶如林鳥旋。疾若坂馬駛。飄飄愧陳人。歷歷見遺趾。流移散空洲。岷嶺尋故壘。波清鳧聚陣。日落魚會市。土屋危可緣。草广突如峙。蓮根漲新圩。蒲芽護荒坻。水花碧團團。雲葉白迤迤。濬修出飛泉。闐闐搜故址。緬思重華帝。允屬夏后氏。彝倫著箕疇。偉功傳遷史。目力渺無窮。行跡端可紀。前村捋柔桑。沃壤接良耜。餘芳錦堆爛。宿麥翠圍侈。迺知東魯儒。終作中朝士。養源匯滉漾。包荒納遐邇。驅馳屢經過。感歎復慰喜。南還幸遂願。永雪洗耳恥。

憶昔三首

憶昔白雲阡。有松如車輪。初日炫五采。湛湛珠露勻。是時十四五。恍不知其因。有客笑指之。慈蔭在汝身。猛志親六籍。百川渺無津。懷刺慎所從。一一先朝臣。文昌古遺直。談經鬱紛綸。授以漆簡書。經緯通天人。碧波掣鯨魚。瑞錦翻麒麟。昌歆世所鄙。食之迺奇珍。廁身金鑾中。黽俛二十春。懼貽先師羞。執筆常逡巡。卽今已六十。誓墓廬松筠。厚德靡有報。淚與寒泉淪。

外家甘盤宅。門閥誠煒煌。高懸金碧榜。中有袞繡堂。珠璣左右侍。絲竹儼成行。幼不識慈顏。到彼心徬徨。每歲兩過之。嚴訓具有方。膏粱病居養。久爾生惰荒。七歲誦詩書。十齡學詞章。駸尋志學歲。折節師老蒼。紀事法班馬。冥心契義黃。謬與時彥交。寶書閱琳琅。今茲乞南歸。往事增慨慷。興懷陶與蘇。秉筆追耿光。凱風有遺思。願言繼餘芳。

寥寥帝王州。我翁佐其治。有亭名朝陽。青溪清且駛。旁有籌邊閣。羣公集裾翠。翹翹萬芰荷。雨過爭旖旎。飛觴羽書來。翕霍江上燧。戟冠極遊談。戎弁生縱恣。予時侍其旁。側耳聽論議。翁言不見取。投劾乃謝事。坐令百萬家。解甲豎降幟。徘徊夕陽亭。晉宋政相似。

重巖圖

爲劉明叟
題翁作

夙昔慕清隱。振衣躡層巒。飛鳥出天末。白雲生樹端。稍覺所歷險。撫松獨盤桓。緬彼巖中人。塵世靡有干。飢食千歲芝。朱顏爛團圓。一日不見之。披圖儼清歡。崩崖冑枯藤。迴流起危湍。微茫暝色共。淩亂生綃寒。心期果冥會。願言力加餐。

王叔載以江梅有佳實。託根桃李場。爲韻見貽。因次其韻。

百川旣東流。震澤成三江。學海詎有窮。泝源探敦龐。緬彼學古人。善問如鐘撞。簞瓢豈在樂。摳衣願爲邦。六籍會有厄。禍繇漢晉開。支離起田孟。誣僞興姚梅。綿蕞匪正禮。區區存曲臺。吟詠旣莫分。褒貶以爲才。戢戢神京秀。轍跡貫九有。秦璋弁如雲。執轡沃在手。欲窮義黃心。編簡滅科斗。研摩詎無念。急景謝衰朽。風雨乖素期。山雞鳴喈喈。豈不念夙昔。愛此日夕佳。平明視青天。羲輪御中街。榮悴會有時。願言壯其懷。高門深寧翁。晚歲悲絕筆。愛彼樸樸才。化爲梗楠質。春花五采妍。秋至詎俱實。遺文粹東楹。賤子願敘述。昔聞中書垣。上有紫薇閣。微言續九共。妙義追八索。嶽岑大廈傾。作記金鑾託。深悲在廣招。寥寥鈞天樂。少小不自持。曲學尊蕪繁。舉觴一酬之。爲言護深根。先天有至理。能使月窟溫。談笑襲師訓。詎知雪齊門。